

LETTRE
DES PROVINCES
DE FRANCE,
AVX BOVRGEOIS
DE PARIS.



A PARIS,
Chez G VILLAVME LOYSON,
&
IEAN BAPTISTE LOYSON.

M. DC. XLIX.

Avec Permission.

CASE

F

39

.326

1649 Let

THE NEWBERRY
LIBRARY



LETTRE
DES PROVINCES
DE FRANCE,
AUX BOURGEOIS
DE PARIS.



MESSIEURS,

Peut-estre que celle-cy sera plus heureuse que tant d'autres, qui toutes iustes qu'elles ont esté, n'ont pas laissé d'estre condamnées & consommées par le feu, tant elles ont trouué des Iuges équitables; & qu'en fin apres auoir essayé tant d'innocens moyens, que l'affection & le zele de vous secourir nous ont peu inspirer, Dieu permettra que ce dernier réussisse, & ne nous refusera pas tant de fois

cette pieuse satisfaction, que nous luy demandons, ce nous semble si iustement, de vous pouuoir faire du moins toutes les offres de nos seruices dans vne con-
iôcture si pressante, & assurer que si iusques icy nous auons manqué à quelque chose, ce n'a esté qu'à trou-
uer les moyens de vous pouuoir tesmoigner, mais d'exécuter l'impatience où nous sommes de joindre nos armes aux vostres, & faire connoistre à tout le monde, que nous ne fûmes iamais, ny assez lasches ny assez insensibles pour preferer la tyrannie d'un Estranger au salut general de nostre Patrie. Vous ne pouuez douter de la sincerité de nos sentimens, & si vous estiez capables d'en conceuoir le moindre soupçon, nous vous dirions ce que vous ne pouuez ignorer, que nous sommes François comme vous, esgalement pleins d'amour & de respect pour nostre Roy, & que si l'estrange & funeste enleuement qui en a esté fait, & qui vous menaçant de vostre perte, nous pre-
disoit à même temps & ineuitablemēt la nostre, vous a mis les armes en main, il nous les a porté dās le cœur, & si vous auez eu l'honneur d'estre les premiers à tra-
uailer à sa deffense aussi bien qu'à la nostre commune, & à rascher de le sauuer des mains d'un Ennemy; Il est pour le moins impossible que vous ayez esté plus prompts à souhaiter de le faire. En sorte que nous n'auions besoin que de la seule voye de pouuoir en seureté faire esclatter nos sentimens, que nous sommes comme forcez de retenir captifs depuis vn si long-temps, par la crainte de nos Gouverneurs &
principaux

principaux Magistrats , & pour n'auoir point de Chefs à qui nous puissions confier la conduite de nos desseins , de nos biens & de nos vies , pour vne si sainte & si importante cause. Nous vous coniurons de le croire, par tout ce qu'il y a de plus cher entre nous , & que quand nos interests ne seroient point comme ils sont inseparablement meslez avec les vostres , nous dirons dauantage , que quád vostre perte deuroit faire nostre bon- heur, & vostre ruine nos fortunes, nous ne pourrions deuenir si barbares que de les acheter aux despens du moindre de nos freres , ny pour les voir souffrir sans leur prester le secours que tous les deuoirs ensemble exigent de nous en ce rencontre & dans vn si estrange accident. Prenez donc seulement courage , MESSIEURS , nous sommes à vous , & si nous attendons , ce n'est que de voir des Capitaines qui nous commandent , & sous qui nos armes puissent heureusement paroistre pour vostre deliurance. Au reste que pouuez-vous craindre ? le Ciel qui protege tousiours tost ou tard l'innocent contre l'oppresseur , & le coupable s'est visiblement déclaré pour la iustice de vos armes , toute la France la connoist , tous les vrays François enuient l'honneur de la sceller de leur sang , & la voix publique nous apprend que l'Espagne mesme, toute ambitieuse de gloire, qu'elle a tousiours esté, prefere à toutes les conquestes qu'elle pourroit faire pendant nos diuisions , celle de pouuoir mesler le sien à vn si iuste & si illustre sacrifice. Tant il est vray que le Ciel

& la Terre à cette fois veulent combattre comme à l'enuy, à rendre enfin à cét Estat chancelant & malheureux, sa premiere vigueur & son ancienne felicité. Apres cela nous croiriez-vous moins affectionnez pour vous que nos ennemis, moins zelez pour le salut & l'honneur de nostre Patrie? ou moins remplis d'impatience & d'amour, pour luy procurer de formais & apres tant de tempestes vne ferme & heureuse Paix, qui la donne en suite à toute la Chrestienté? Vous n'aurez pas de si bas sentimens de nous, & nous nous asseurons que sans vous coucher plus au long les nostres, vous serez parfaitement persuadez que comme nous ne pouuions auoir de plus iustes, aussi n'auons-nous iamais eu de plus ardents desirs; que de vous tesmoigner promptement & par effets que nous sommes & demeurerons inuiolablement,

MESSIEURS,

Vos bons & fideles amys,
les Habitans des Prouin-
ces de France.



